

Peqqinnissaq pillugu ataatsimiititaliarsuup sulinissaanut tunngavissiamik UPA2020-mut siunnersuummik saqqummiusseqqullugit Naalakkersuisut peqquneqarnissaannik aalajangiiffigisassatut siunnersuut. Ataatsimiititaliarsuaq peqqinnissaqarfimmi ataatsimut isigalugu pitsanngorsaatisannik inassuseqaasiussaaq, tassunga ilanngullugit sulisussarsiortarneq, sulisut sulisoriinnarnissat kiisalu Danmarkimik nunanillu allanik suleqateqarneq. Inassuteqaatit peqqinnissaqarfimmi aqqissuusseqqinnissamut Inatsisartut politikikkut tunngavigissavaat. Minnerpaamik peqqinnissamik suliaqartut kattuffii aamma soqu-tisaqartut Kalaallit Nunaanni peqqinnissaqarfissaqarfimmi suliaqarnermik ilisimasaqartut ataatsimiititaliarsuarmi sinnisoqassapput.

pillugu

Ilaqutariinnermut Peqqissutsimullu Ataatsimiititaliap

siunnersuutip aappasaaneerpeqarneranut

Isumaliutissiissutaa

Ataatsimiititaliap suliarinninnermini makku ilaasortarai:

Inatsisartunut ilaasortaq Mala Høy Kúko, Siumut, siulittaasoq

Inatsisartunut ilaasortaq Stine Egede, Inuit Ataqtigiit, siulittaasup tullia

Inatsisartunut ilaasortaq Karl Kristian-Kruse, Siumut

Inatsisartunut ilaasortaq Malene Vahl Rasmussen, Demokraatit

Inatsisartunut ilaasortaq Anna Wangenheim, Demokraatit

Inatsisartunut ilaasortaq Aqqa Samuelsen, Inuit Ataqtigiit

Inatsisartunut ilaasortaq Mikivsuk Thomassen, Inuit Ataqtigiit

UKA2019-mi ulloq 10. oktoberimi siullermeerinerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Peqqinnissaq pillugu ataatsimiititaliarsuup sulinissaanut tunngavissiamik UPA 2020-imut siunnersuummik saqqummiusseqqullugit Naalakkersuisut peqquneqarput. Peqqinnissaq pillugu ataatsimiititaliarsuaq ataatsimut isigalugu peqqinnissaqarfimmi pitsanngorsaatisannik kaammattuuteqassaaq tamatumalu saniatigut peqqinnissaqarfimmi aqqissuusseqqinnissamut Inatsisartut naalakkersuinikkut tunngavissinneqarnissaat siunertaavoq.

Tamatuma saniatigut tunngavissiap ilusissavia pillugu Inatsisartuni partiinit tamanit tamakkiisumik isumaqatigiissutigineqassasoq aammalu Naalakkersuisunit isummertoqassasoq siunnersuuteqartoq isumaqarpoq. Peqqinnissamik suliaqartut kattuffii aamma suliamik ilisimasallit allat peqqinnissaq pillugu ataatsimiititaliarsuarmi sinniisuutitaqarnissaat aammalu tunngavissiap inaarutaasumik oqaasertaliorneqarnerata tamatumani anguniarneqarnissaa pingaaruteqartoq siunnersuuteqartoq isumaqarpoq.

2. Saaffiginnissutit

Siunnersuuteqartoq nammineq kiissaateqarnini naapertorlugu ataatsimiititaliap immikkoortup suliarinerani peqataatinneqarpoq.

3. Sassartitsinerit

Ulloq 25. oktober ataatsimiititaliap sassartitaqarnerani kattuffiit uku sassartinneqarput:

- Peqqinnissaq Pillugu Kattuffiit (naalisarlugu PPK)

Peqqinnissaq Pillugu Kattuffimmiit uku peqataapput:

Pillorissaasut siulittaasuat Sara Jilsø Fleischer, Peqqissaasut aamma PPK-mi siulittaasoq Ken Jensen, Nerisaqarnermut Inuussutissaqarnermullu siulittaasoq aamma PPK-mi siulittaasup tullia Lis Lauridsen aamma sulianut tunngatillugu allatsi Line Kronborg Danielsen.

Peqqinnissaqarfimmi ineriartornermut peqqinnissamik suliaqartut misigisartagaat pillugit ataatsimiititaliamut sassartinneqarnermi ilisimatitsissutigineqarnissaat siunertarinqartoq aallarniutigalugu PPK-p paasissutissiissutigaa. Peqqinnissaqarfik pillugu Aningaasaqarnermut Siunnersuisoqatigiit nalunaarusiaat isumaqatigalugu PPK-p oqaatigaa¹. Taartaasartoqarfimminngaanneersunik atuisarneq pingaartumik ernumassutigineqarpoq, isumaqarlutillu aningaasarsiat qaffanneqarnerisigut najugaqavissut inuiaqatigiinni naleqarnerulersinneqarsinnaagaluartut. Tamatuma saniatigut nukissaarunnerup kingunerisaanik napparsimallutik (stress) nalunaartartut amerliartornerisa kingunerisaanik suliffimmi atukkat pitsanngorsaavigineqartariaqartut siulittaasut tamarmik ilisimatitsissutigaaat. PPK-mi isumaqarput akuutinneqarnatik sullivimminni aaqqissuusseqqittarnerit annertuut ingerlanneqartarsimasut. Assersuutigalugu sullissinissamut najoqqutassiami sulisussarsiornerit oqaluuserineqartussaattillugit akuutinneqartarnissaq ersarissumillu suliamik ilisimasallit oqariartuutaasa amigaataasarnerat. Tamakku saniatigut utoqqaat sungiusarneqartarnissaat amigaataavoq, matumani pillorissaasut piginnaasaat pitsaaneruseqarnerumik atorluarneqarsinnaagaluar mata.

Assigiinngitsutigut takuneqartarpoq, ilaasortat atorfinitsineqarnerinut atatillugu neriorsuutaasarsimasut eqqortinneqarneq ajorneri, atorfininnermut isumaqatigiissutit amigaataasarpur, atorfiillu arlaannik assigiinngitsunik pissuteqartumik inuttalerneqanngitsoortarput, ilaatigut inuttassarsiornermi atorfimmut tunngasunik erseqqarluttoqartarnera peqqutigalugu, tamakku kingunerisarpaat naggataani akisunerulersitsisarlutik, eqqortunik atorfinitsitsisoqarneq ajornera pissutigalugu.

Peqqinnissaqarfimmullu tunngatillugu periusissiortoqartillugu pilersarusiortoqartillugulu pitsaaneruseqarnerumik oqaloqatigiittoqartarnissaa tunngavissiortoqartarnissaa PPK-mit ujartorneqarpoq, taamaattumillu peqqinnissaq pillugu ataatsimiititaliarsuarmi sinniisuutitaqarnissartik sulissutigalugu oqaatigalugu. Sulianik ilisimasallit sammineqarnerunissaat ujartorneqarpoq, siunissamilu peqqinnissaqarfiup

¹ Økonomisk råd 2019- Grønlands Økonomi 2019

pilersaarusiordfigineqarnerani peqqissutsimut tunngasunut suliaqartut kattuffii akuutinneqarnissaat pingaaruteqartoq isumaqarfigineqarpoq.

4. Apeqqutit

Ataatsimiititaliap siunnersuummik suliaqarnermini atugassaminik apeqqutit arlaqartut akineqarnissaat pillugu Peqqissutsimut, Isumaginninnermut Inatsisinillu Atuutsitsinermut Naalakkersuisoq ataatsimiititaliamit qinnuigivaat. Ataatsimiititaliap apeqquteqaataasa aamma Peqqissutsimut, Isumaginninnermut Inatsisinillu Atuutsitsinermut Naalakkersuisup akissuteqaataasa assilineri isumaliutissiisummi matumani ilanngussa 1-itut ilanngunneqarput.

Siunnersuutaqqaartumut sanilliullugu Naalakkersuisut allannguutissatut siunnersuutaat Naalakkersuisut qanoq kinguneqarumaarnersoq sukumiinerusumik allaaserineqarnissaa ataatsimiititaliamit qinnutigineqarpoq. Akissummi ulloq 22. oktober 2019-imi tiguneqartumi peqqinnissaq pillugu pilersaarusiap nutarterneqarnissaanik suliaqartussanik suleqatigiissitamik naalakkersuisoqarfimmi atorfilittanik inuttaqartumik pilersitsisoqarsimasoq akissuteqaammi allassimavoq. Suleqatigiissitap makku suliarigai ataatsimiititaliamit paasineqarpoq:

- Peqqinnissaqarfimmi atortut pigineqareersut nalunaarsussallugit
- Siunissami atuuffiit nalinginnaasut takussutisiorneqarnissaat kiisalu peqqinnissamut tunngasuni suliassanik aaqqiisarnissaq, matumani ilanngullugu immikkut ilisamasalinnik sulisussanik pisariaqartitsineq
- Suliassat siuliani taaneqartut aningaasatigut paasissutissartaasa ataqatigiissinneqarnissaat
- Kalaallit Nunaanni siamasissumik inulimmut nunanut assingusunut peqqinnissakkut sullissinerit pillugit paasissutissanik attuumassuteqartunik ujartuisoqarnissaa katersisoqarnissaalu
- Suliassat suut siunissami peqqinnissaqarfimmit aaqqinneqarnissaannut qanorlu aaqqinneqassanersut pilersaarummik suliaqarneq.

Sulinissamut tunngavissiorneqarnissamut ataatsimiititaliarsuup suliassai nassuiarneqarsimasut suliassat qulaani taaneqartut tunngavigalugit Naalakkersuisut isummerumaartut akissuteqaammi ilanngullugu allassimavoq.

Tamatuma saniatigut Danmarkimik nunanillu allanik suleqateqarneq eqqartorneqartoq pillugu Peqqissutsimut, Isumaginninnermut Inatsisinillu Atuutsitsinermut Naalakkersuisoq ataatsimiititaliamit apeqquteqarfigineqarpoq. Akissuteqaammi allassimavoq, sulinissamut tunngavissap inaarutaasumik oqaasertaliorneqannginnerani ataatsimiititaliaq tusarniarneqarumaartoq, taamaaliornikkut sulinissamut tunngavissap imarisasaanut sunniuteqarnissamut periarfissinneqarumaarluni.

5. Siunnersuummik ataatsimiititaliap suliarinninnera

Siunnersuuteqartup siunnersuutaqqaartutut saqqummiussaani Naalakkersuisullu allannguutissatut siunnersuutaanni nukittoqutaasut sannguequtillu ataatsimiititaliamit sukumiisumik eqqarsaatersuutigineqarput.

Siunnersuutaqqaartoq ima oqaasertaqarpoq:

"Peqqinnissaq pillugu ataatsimiititaliarsuup sulinissaanut tunngavissiamik UPA2020-mut siunnersuummik saqqummiusseqqullugit Naalakkersuisut peqquneqarnissaannik aalajangiiffigisassatut siunnersuut. Ataatsimiititaliarsuaq

peqqinnissaqarfimmi ataatsimut isigalugu pitsanngorsaatisanik inassuseqaasiussaaq, tassunga ilanngullugit sulisussarsiortarneq, sulisut sulisoriinnarnissat kiisalu Danmarkimik nunanillu allanik suleqateqarneq. Inassuteqaatit peqqinnissaqarfimmi aaqqissuusseqqinnissamut Inatsisartut politikkikkut tunngavigissavaat. Minnerpaamik peqqinnissamik suliaqartut kattuffii aamma soqutisaqartut Kalaallit Nunaanni peqqinnissaqarfissaqarfimmi suliaqarnermik ilisimasaqartut ataatsimiititaliarsuarmi sinniisoqassapput.”

Naalakkersuisut allannguutissatut siunnersuutigisaat ima oqaasertaqarpoq:

”Peqqinnissaq pillugu ataatsimiititaliarsuup sulinissamut tunngavissiamik UPA2020-mut siunnersuummik saqqummiusseqqullugit Naalakkersuisut peqquneqarnissaannik aalajangiiffi-gisassatut siunnersuut. Ataatsimiititaliarsuaq peqqinnissaqarfimmi ataatsimut isigalugu pitsanngorsaatisanik inassuteqaasiussaaq, tassunga ilanngullugit sulisussarsiortarneq aamma sulisut sulisoriinnarnissaat. Suliamut attuumassutilimmik soqutigisaqartut ilaatinneqarneratigut ataatsimiititaliarsuarmi sulineq Kalaallit Nunaanni Peqqinnissaqarfimmi peqqinnissakkut pilersaarusionerup aaqqissuunneqarneranik aallaveqassaaq. Innersuussutit Inatsisartut politikkiliornerannut tunngavigineqassapput.”

Naalakkersuisut allannguutissatut siunnersuutaata tunngavissiasatut sulinissamut peruserineqartussaq imarisaanullu annertuumik allanngortissagaa ataatsimiititaliap nalilerpaa (takuuk isumaliutissiisummi matumani immikkoortoq 4-mi apeqquateqaatit). Siunnersuutaqqaartumi peqataatinneqartussat soqutigisaqartullu immikkuullarissut allaaserineqarsimaneri sulinissamullu tunngavissiap oqaasertaliorneqarneranut atatillugu periusissaq aammalu ataatsimiititaliarsuami kikkut sinniisuutitaqalernissaat pillugu siunnersuuteqartumit eqqarsaatersuutigineqarsimanagera nukittoqutaasoq isumaqarfingeqarpoq. Akerlianilli, sumi qaqugukkullu soqutigisaqartut assigiinngitsut ilanngutsinneqarnissaat allannguutissatut siunnersuummi immikkut erseqqarissumik allaaserineqarsimanani.

Peqqinnissaqarfiup siunissami pilersaarusiortifingeqarnerani ilinniagaqartut kattuffii aallaqqaataaniit naggataanut pisariaqartinneqartut soqutigisaqartullu peqataatinneqarnissaallu siunnersuuteqartoq ataatsimiititaliamit isumaqatigineqarpoq. Tamatumunnga atatillugu ilinniagaqartut kattuffii allat soorlu Kalaallit Nunaanni nakorsat peqatigiiffiat allallu kattuffiit attuumassuteqarsinnaasut ataatsimiititaliamit aamma eqqarsaatigineqarput. Ilinniagaqartut kattuffii ataatsimiititaliarsuarmi sinniisuutitaqassanersut apeqqutigineqartunut akissutigineqartumi erseqqissumik akineqarsimanersut ataatsimiititaliamit qulakkeerneqanngilaq, ataatsimiititaliammi paasinninnera naapertorlugu ataatsimiititaliarsuup suliassai suunersut apeqqutaasussaammata.

Peqqinnissaqarfiup nutarterneqarnissaanut suliassaq taama annertutigimmat Inatsisartunullu ilaasortanut naalakkersuinikkut tunngavissiiisussaammatt sulinissamut tunngavissiaq qanoq kimillu oqaasertaliorneqassanersooq ataatsimiititaliarsuamilu kikkut sinniisuutitaqassanersut annertunerusumik ersarissarneqarnissaa naggataatigut ataatsimiititaliamit kaammattuutigineqassaaq.


6. Siunnersuutip aningaasatigut kingunerisassai

Siunnersuutip piviusunngortinneqarnissaanut aningaasatigut kingunerisassai allanneqarsimmammata ataatsimiititaliamit maluginiarneqarpoq, taamaaliornikkut aalisarneq pillugu ataatsimiititaliarsuup pilersinneqarneranut atatillugu aningaasartuutaasimasut aallaavigineqarsimallutik 2019-imut 2 mio. kr.-t pilersitsinermut ingerlatsinermullu atugassanik immikkoortitsisoqarsimalluni. Taama missingissiorimanermut allatut naliliinissamut ataatsimiititaliamit pisariaqartinneqanngilaq.

7. Ataatsimiititaliap inassuteqaatai

Siunnersuutaqqaartoq akuerineqassasoq ataatsimiititaliap isumaqatigiittup inassutigaa.

Taama oqaaseqarluni siunnersuut ataatsimiititaliamit aappassaaniigassanngortinneqarpoq.



Mala Høy Kúko

Siulittaasoq

Siumut



Stine Egede

Inuit Ataqtigiit



Karl Kristian-Kruse

Siumut



Malene Vahl Rasmussen

Demokraatit



Anna Wangenheim

Demokraatit



Aqqa Samuelsen

Inuit Ataqtigiit



Mikivuk Thomassen

Inuit Ataqtigiit



INATSISARTUT

Peqqissutsimut, Isumaginninnermut Inatsisinillu

Atuutsitsinnermut Naalakkersuisoq

Ulloq: 08-10-2019

J.nr.: 01.38.01.03-00122

Peqqinnissaq pillugu ataatsimiititaliarsuup sulinissaanut tunngavissiaq pillugu UKA 2019/98-mut tunngatillugu apeqquteqaatit

UKA 2019/98-p siullermeerneqarneranut atatillugu siunnersuut ataatsimiititaliamut suliarineqartussanngorlugu innersuunneqarpoq. Tamatumunnga atatillugu Ilaqutariinnermut Peqqissutsimullu Ataatsimiititaliaq Naalakkersuisunut itisiliilluni apeqquteqarnissaminut kissaateqarpoq. Immikkoortup siullermeerneqarneranut atatillugu allannguutissatut siunnersuummik Naalakkersuisut saqqummiussaqaqarnerannut apeqqutigineqartussat tunngassuteqarput.

Siunnersuutaaqqaartoq ima allassimavoq:

"Peqqinnissaq pillugu ataatsimiititaliarsuup sulinissaanut tunngavissiamik UPA2020-mut siunnersuummik saqqummiusseqqullugit Naalakkersuisut peqquneqarnissaannik aalajangiiffigisassatut siunnersuut. Ataatsimiititaliarsuaq peqqinnissaqarfimmi ataatsimut isigalugu pitsanngorsaatissanik inassuseqaasiussaaq, tassunga ilanngullugit sulisussarsiorarneq, sulisut sulisoriinnarnissaat kiisalu Danmarkimik nunanillu allanik suleqateqarneq. Inassuteqaatit peqqinnissaqarfimmi aqqissuusseqqinnissamut Inatsisartut politikkikkut tunngavigissavaat. Minnerpaamik peqqinnissamik suliaqartut kattuffii aamma soqutisaqartut Kalaallit Nunaanni peqqinnissaqarfissaqarfimmi suliaqarnermik ilisimasaqartut ataatsimiititaliarsuarmi sinniisoqassapput"

Naalakkersuisut allannguutissatut siunnersuutaanni ima allassimavoq:

*"Peqqinnissaq pillugu ataatsimiititaliarsuup sulinissaanut tunngavissiamik UPA2020-mut siunnersuummik saqqummiusseqqullugit Naalakkersuisut peqquneqarnissaannik aalajangiiffigisassatut siunnersuut. Ataatsimiititaliarsuaq peqqinnissaqarfimmi ataatsimut isigalugu pitsanngorsaatissanik inassuteqaasiussaaq, tassunga ilanngullugit sulisussarsiorarneq aamma sulisut sulisoriinnarnissaat. **Suliamut attuumassutilimmik soqutigisaqartut ilaatinneqarneratigut ataatsimiititaliarsuarmi sulineq Kalaallit Nunaanni***

Peqqinnissaqarfimmi peqqinnissakkut pilersaarusionerup aaqqissuunneqarneranik aallaveqassaaq. Innersuussutit Inatsisartut politikkiliornerannut tunngavigineqassapput”.

(Qernertumik naqinnillit ataatsimiititaliap maluginiagai)

Peqqinnissaqarfiup pilersaarusionerata nutarsarneqarnissaa pillugu ataatsimiititaliaq siusinnerusukkut ilisimatinneqarpoq, allakkiamilu ulloq 27.09.2019-imi tiguneqartumi Naalakkersuisut ima allapput:

”Peqqinnissaqarfimmik ingerlatsinermut tunngaviusumik isumaqatigiisummik nutaamik suliaqartoqarnissaa siunertaralugu Peqqinnissaqarfiup pilersaarusionera nutarsarneqassaaq”.

Ataatsimiititaliamit immikkut maluginiarneqarpoq:

Suliami Naalakkersuisunut suliaqquneqartumi peqqinnissaqarfiup pilersaarusioneraneqarnera nammineq nutarsaanissamik pingaarnertut suliaq Naalakkersuisunit ilanngunneqareersimanissaa allannguutissatut siunnersuutip kingunerissavaa.

- 1) Tunngavissiamik aammalu peqqinnissaq pillugu ataatsimiititaliarsuarmik pilersitsinissamut oqaasertalerneqarnissaanut sulineramik allannguinerup qanoq kinguneqarnissaata itisilerneqarnissaa ataatsimiititaliamit kissaatigineqarpoq.

Ataatsimiititaliamit aamma maluginiarneqarpoq Danmarkimik nunanillu allanik suleqateqarneq pillugu siunnersuutaqqaartumi pingaartinneqartoq allannguutissatut siunnersuummi ilaanngitsaq:

- 2) Naalakkersuisut uppersarsinnaavaat Danmarkimik nunanillu allanik suleqateqarneq nunanilu allani suliaritittarnernut tunngasut peqqinnissaq pillugu ataatsimiititaliarsuarmi aallutiinnarneqassanersut?

Naggataatigut ataatsimiititaliap allannguutissatut siunnersuut akuerineqassappat “suliamut attuumassutilimmik soqutigisaqartut” erseqqissaasutigineqarnissaa pisariaqartippaa. Siunnersuutaqqaartumi ima allassimavoq:

”Minnerpaamik peqqinnissamik suliaqartut kattuffii aamma soqutigisaqartut Kalaallit Nunaanni peqqinnissaqarfissaqarfimmi suliaqarnermik ilisimasaqartut ataatsimiititaliarsuarmi sinniisoqassapput”

- 3) Peqqinnissamik suliaqartut kattuffii sulianillu ilisimasallit allat ataatsimiititaliarsuamut ilaatinneqaannarnissaat suli Naalakkersuisunit naatsorsuutigineqarsimappat aamma Naalakkersuisut ” Suliamut attuumassutilimmik soqutigisaqartut” sukumiinerusumik nassuiarsinnaavaat?

Naalakkersuisut akissuteqaatissaat kalaallisut danskisullu ataatsimiititaliamit qilanaarneruput. Akissuteqaatip qarasaasiakkut uunga ina@ina.gl ataatsimiititaliallu allattaanut assilinera ukununga mika@ina.gl –mut aamma lobd@ina.gl –mut nassuunneqarnissaa qinnutigineqarpoq

Ilaqutariinnermut Peqqissutsimullu Ataatsimiititaliaq

sinnerlugu

Inussiarnersumik inuulluaqqusillunga



Mala Høy Kúko

Ataatsimiititaliap allattaa



Ilaqutariinnermut Peqqissutsimullu Ataatsimiititaliaq

22-10-2019
Sags nr. 2019-18996
Akt nr. 11896473

Postboks 1001
Tlf: 34 68 00
Fax (+299) 32 45 47
E-mail: PN@nanog.gl
www.nanog.gl

UKA 2019/98, Peqqinnissaq pillugu ataatsimiititaliarsuarmut suliakkiut pillugu apeqqutit

Imm. UKA 2019/98-imut allannguutissatut siunnersuut pillugu apeqqutitut nassinneqartunut qujanaq. Apeqqutitut akissutit matuma kinguliani allassimapput.

- 1) Tunngavissiamik aammalu peqqinnissaq pillugu ataatsimiititaliarsuarmik pilersitsinissamut oqaasertalerneqarnissaanut sulineramik allannguinerup qanoq kinguneqarnissaata itisilerneqarnissaa ataatsimiititaliamit kissaatigineqarpoq.**

Akissut:

Peqqinnissaqarfimmi peqqinnissamut pilersaarutip nutarternera nalilersoqqillugu atorfilittat maannangaaq suliarat, tamatumani suliamut attuumassutillit suliaq pillugu tusarniarneqassallutik. Ataatsimiititaliaq suliaq pillugu nassuiaat ilisimatinneqareerpoq.

Atorfilittat suliaq sulit piareersarneqarput. Maannangaaq aallutassarfiit matuma kingulianiittut sulissutigineqarput:

1. Peqqinnissaqarfimmi atortorissaarutit pigineqartut nalunaarsorneqarnerat maanamullu suleruseq naapertorlugu immikkoortiterneqarnerat, tassunga ilanngullugu DIN-imi immikkoortortaqarfiit immikkut ittut kigutillu nakorsaasa sulinerat pillugu paasissutissat.
2. **Siunissami** peqqinnissaqarfiup immikkoortuini sumiiffinnilu assigiinngitsuni suliaq tunngavissut allattorsimaffiat, ass. aaviineq, kinguaassiutitigut nappaatinik tunillaasoqarsimaneranik misissuineq, naartusumik sullissineq, tassunga ilanngullugu ultralydsscanningit, tarrarsuilluni misissuinerit, uummatikkut milittoornernik misissuinerit, isinik misissuinerit assigiinngitsutigullu pilattaasernerit.

3. Suliassat immikkut ittut Nuummi ingerlanneqartut toqqarneqarsimasut pillugit allattorsimaffik, ass. seeqqusalilluni siffiaasalillunilu pilattaanissamut, kræftimik katsorsaanissamut, inunnguajaarsimasunik katsorsaanermut aamma meerartaarsinnaangitsumik katsorsaanermut pilersaarutit.

4. Suliassanut atatillugu aningaasartuutit missingerneqarsinnaaniassammata suliassat aningaasaqarnikkut paasissutissalernerneqarnissaat.

5. Nunani tamalaani ilisimasanik aammalu nunanit allanit siammasissumik nunassittariaasilinnit peqqissutsikkut sullissinermi assingusunik ajornartorsiutillinnit misilittakkanik katersuineq.

6. Suliassat qanoq isumagineqartalernissaannut pilersaarut.

Suliaq tamanna tunngavigalugu aaqqiissutissatut siunnersuutit ajornartorsiutillu taakkartorneqartut Naalakkersuisunitt kissaatigineqarpat politikkikkut pilersinneqartumit ataatsimiititaliarsuarmut isummerfigineqartussatut suliarineqarsinnaassapput. Taamaalilluni atorfilittat suliaat tunngavigalugit Naalakkersuisut suliakkiummik aalajangersaasinnaassapput, tassani ataatsimiititaliarsuup suliassai nassuiaatigineqarsinnaassallutik.

- 1) **Naalakkersuisut uppersarsinnaavaat Danmarkimik nunanillu allanik suleqateqarneq nunanilu allani suliarittarnernut tunngasut peqqinnissaq pillugu ataatsimiititaliarsuarmi aallutiinneqassanersut?**

Akissut:


Peqqinnissaq pillugu ataatsimiititaliarsuarmut suliakkiutip akuerineqarnissaanut piareersarnermi ilaqtuariinnermut peqqissutsimullu ataatsimiititaliaq suliakkiutip Naalakkersuisunit akuerineqannginnerani suliakkiut pillugu tusarniarneqarsinnaavoq. Taamaalilluni ataatsimiititaliaq peqqinnissaq pillugu ataatsimiititaliarsuup qitiutillugit aallutassanut sunneeqataasinnaassaaq.

- 1) **Peqqinnissamik suliaqartut kattuffii sulianillu ilisimasallit allat ataatsimiititaliarsuarmut ilaatinneqaannarnissaat suli Naalakkersuisunit naatsorsuutigineqarsimappat aamma Naalakkersuisut ” Suliamut attuumassutilimmik soqutigisaqartut” sukumiinerusumik nassuiarsinnaavaat?**

Akissut:

Takuuk 2)-mi akissut

Inussiarnersumik inuulluaqqusillunga


Martha Abelsen